

## **Inatsisissamut siunnersuummut oqaaseqaatit**

### **Oqaaseqaatit nalinginnaasut**

#### **1. Inatsisissatut siunnersuutip tunulequtaa**

Inatsisartut inatsisaata allanngortinneqarnissaanut siunnersuutip saqqummiunneqarnerata tunulequtarivaa Kalaallit ilinniagaqartut, ilinniarnissartik siunertaralugu nunanut allanut nuukkallarsimasut Inatsisartunut qinersinerni qinerseqataasartut amerlanerulernissaasa sulissutigineqarnissaa pillugu Naalakkersuisut peqquneqarnissaannik Inatsisartut aalajangiiffigisassaattut siunnersuummut Inatsisartut inatsisinut ataatsimiititaliaat isumaliutissiissummik tunniussaqaarneratigut, siunnersuutiginnittuovoq Inatsisartuni ilaasortaq Andreas Uldum, UPA 2012/65.

Ataatsimiititaliap kissaatigivaa, ukiamut ataatsimiinnissami Inatsisartut Kalaallit Nunaanni Inatsisartunut qinersisarnermut Inatsisaannik atuuttumik, inatsisip § 20-ani imm. 5, allannguinnissamik siunnersuummik Naalakkersuisut saqqummiussinissaat, taamaasilluni sapaatit akunnerinik arfinilinnik periarfissiineq allanngortinneqarluni.

#### **Inatsisinut Ataatsimiititaliap siunnersuut pillugu oqaaseqaatai:**

*Inatsisinut Ataatsimiititaliap isumaqatigiittup tamakkiisumik siunnersuutip siunertaa tapersersorpaa: tassa Inatsisartunut qinersinermi, kalaallit ilinniartut qinersisinnaatitaaneranni tigussaasumik akornutaasinnaasut sapinngisamik annikillisarnissaat. Siunnersuutip siullermeeraluni suliarineqarnerani partiit tamarmiusut anguniakkamut isumaqataapput.*

*Siunnersuuteqartup tunngavilersuutimini siunnersuutip atuuttussanngortinnissaanut periarfissat assigiinngitsut tikkuarai Inatsisinut Ataatsimiititaliap paasivaa, kisianni siunnersuut akuerineqassappat, Naalakkersuisunit qanoq siunnersuutip iluseqarluni atuuttussanngortinneqarnissaa Naalakkersuisut nammineerlutik aalajangissavaat.*

*Inatsisinut Ataatsimiititaliap aamma paasivaa, siunnersuut Naalakkersuisunit akuerissassanngorlugu inassutigineqartoq, suliallu ingerlateqqinnerani siunnersuuteqartup qanoq aaqqiissuteqarnissamut periarfissatut tikkuagai, ilanngunneqarsinnaasut*

*oqaatigalugu, Inatsisartullu inatsisaannik kingusinnerusukkut allanngueratarsinnaanermut atatillugu naliliivigineqarumaarluni.*

*Aaqqiissutissatut siunnersuutit ataasiakkaat inatsisilerineq eqqarsaatigalugu piviusunnngortinneqarsinnaanerannik naliliineq apersorneqarnermini Naalakkersuisup Anthon Frederiksenip erseqqinnerusumik nassuiaatigaa.*

*Piffissakinnerli pissutigalugu inatsisitigut allatigullu aporfiusinnaasut tamakkiisumik qulaajarnissaat pisinnaasimannngilaq.*

*Apersuinermi paasisutissat Naalakkersuisoq Anthon Frederiksenip saqqummiussai tunngavigalugit ersarippoq atuuttussanngorlugit iliuusissatut siunnersuutigisat sisamaasut ilaat marluk pisariitsumik atuuttussanngortinneqarsinnaasutut isikkoqarmata.*

*Siullertut sapaatip akunnerinik arfinilinnik periarfissaqartitaanermik allannguisinnaaneq. Malittarisassat ullumikkut atuuttut malillugit, kalaallit ilinniariarlutik Danmarkimut nuukkallarnikut ulloq qinersiffiusoq kingusinnerpaamik sapaatip akunnerinik arfinilinnik sioqqullugu qinersisussat allassimaffiannut ilanngussimannngikkunik Inatsisartunut qinersinermut peqataasinnaannngillat. Naalakkersuisoq paasisutissiivoq sapaatit akunnerinik arfinilinnik periarfissiinerup sapaatit akunnerinut pingasunut appartinnissaata piviusunnngortinnissaa aporfinnik nassataqassanngitsutut Naalakkersuisoqarfimmit nalilerneqartoq, Kalaallit Danmarkimi ilinniartut, Inatsisartunut qinersinissap nalunaarutiginera sioqqullugu qinersisussat allassimaffiannut ilanngussimannngitsut, taamaasillutik qinersisussat allassimaffiannut ilanngunnissamut angumersinissamut periarfissaat pitsaanerulissaaq. Taanna aaqqiissutissatut periarfissaq Kalaallit Nunaanni Inatsisartunut qinersisarneq pillugu Inatsisartut inatsisaannik pisariitsunnguamik allannguineramik pisariaqartitsivoq.*

*Periarfissaq alla pisariitsoq tassaavoq Ilinniartut nooqqaarnerannut atatillugu, tamatumalu kingorna ukiut marlukkaarlugit qinersisussat allassimaffianiiginnarnissaannik periarfissap tigussaasumik erseqqissaatiginissaa (assersuutigalugu qinersisinnaanerup attatiinnarnissaanik periarfissaq pillugu atuagaaqqamik paasisutissiissutitalimmik, kiisalu tamatumunnga atugassamik qinnuteqarnermut immersugassamik ilinniartup nassitsiffi generatigut). Naalakkersuisup apersuiffimmi paasisutissiissutigaa, Naalakkersuisut periarfissaq taanna pitsaasutut isigigaat, tassungali atatillugu Naalakkersuisut akissuteqaataannut innersuussilluni, tassanilu ersippoq Kalaallit Nunaata Københavnimi sinniisooqarfia tamanna sioqqullugu, assersuutigalugu kalaallit illuinut, ilinniartoqarfinnut, ilinniartut najugaqarfiinut kalaallillu ilinniartut Danmarkimi kattuffiannut (Avalak) ulloq qinersiffissaq pillugu, allakkatigullu qinersisinnaanermut periarfissamik paasisutissanik nassiussuisarmat. Ataatsimiititaliap akissuteqaammut innersuussineq imatut paasivaa, periarfissaq taannarpiaq Naalakkersuisunit pitsaasuusutut isigineqartoq, Naalakkersuisut*

*iliusereriigaat sinnerlugit Naalackersuisunit allamik iliuseqarnissamik piumasagaatitaqangimmat.*

*Siunnersuutit marluk allat taaneqartut piviusunngortinneqarsinnaanerinit periarfissat ajornakusoorsorineqarput, allaffissornikkut pisariullutik nukinnillu annertuumik akuinissamik pisariaqartitsillutik.*

*Taamaattumik ataatsimiititaliap kissaatigissavaa, ukiamut ataatsimiinnissami Inatsisartut Kalaallit Nunaanni Inatsisartunut qinersisarnermut Inatsisaannik atuuttumik, inatsisip § 20-ani imm.5, allannguinnissamik siunnersuummik Naalackersuisut saqqummiussinissaat, taamaasilluni sapaatit akunnerinik arfinilinnik periarfissiineq allanngortinneqarluni. Tassungali atatillugu Inatsisartut Ataatsimiititaliap Naalackersuisut kaammatussavai kalaallit ilinniartut Inatsisartunut qinersinissamat periarfissaannut aporfiusinnaasunik sunilluunniit suli millisaanissaq siunertaralugu, Naalackersuisut qulaajaanermik suliaqarnertik ingerlatiinnassagaat.*

## **2. Siunnersuummi immikkoortut pingaernerit**

<b>Inatsisissamat siunnersuut inatsimmuut atuuttumut sanilliullugu</b>	
<i>Aalajangersagaq atuuttoq ima allassimavoq</i>	<i>Inatsisissamat siunnersuut</i>
	<b>§ 1</b>
	Kalaallit Nunaanni Inatsisartunut qinersisarneq pillugu Inatsisartut inatsisaanni nr. 9, 31. oktober 1996-imeersumi, Inatsisartut inatsisaatigut nr. 10, 30. oktober 1998-imeersukkut allanngortinneqartumi, ima allannguisoqassaaq:
§ 20. <i>Imm. 5.</i> Qinersisartut Kalaallit Nunaat qimallugu najugaqalerallartut aammalu § 2-mi piumasagaatinik eqquutsitsisut qinersinissaq sioqqullugu kingusinnerpaamik sap. akunnerisa arfinilissaanni tamanna pillugu aalajangiisoqarsimappat qinersisussat allattorsimaffiannut ilanngunneqassapput, takuuk § 22.	<b>1.</b> § 20, imm. 5-imi ikkunneqassaaq: ” <i>Imm. 5.</i> Qinersisartut Kalaallit Nunaat qimallugu najugaqalerallartut aammalu § 2-mi piumasagaatinik eqquutsitsisut qinersinissaq sioqqullugu kingusinnerpaamik sap. akunnerisa pi-ngajussaanni tamanna pillugu aalajangiisoqarsimappat qinersisussat allattorsimaffiannut ilanngunneqassapput, tak. § 22.”

	<p><b>§ 2</b></p> <p>Inatsisartut inatsisaat atuutilissaaq ulloq 1. januar 2013.</p>
--	--

**3. Pisortat ingerlatsiviinut aningaasatigut allaffissornikkullu kingunerisinnaasai**

Pisortat ingerlatsiviinut aningaasatigut allaffissornikkullu siunnersuut kinguneqassanngitsoq ilimagineqarpoq. Sap.ak. arfinilinnik killissarititap sap.ak. pingasunut allanngortinneqarnerata allaffissornikkut annertunerusumik kinguneqassanngitsoq taamaattorli qinersisussat allassimaffiannut ilanngunneqarnissamik qinnuteqaatit amerliallannissaat ilimagineqarsinnaavoq.

**4. Inuutissarsiuteqarnikkut il.il aningaasatigut allaffissornikkullu kingunerisinnaasai**

Inuutissarsiuteqarnikkut il.il. aningaasatigut allaffissornikkullu siunnersuut kinguneqassanngitsoq ilimagineqarpoq.

**5. Pinngortitamut, avatangiisinut aamma inuiaat peqqissusaanut kingunerisinnaasai**

Pinngortitamut, avatangiisinut aamma inuiaat peqqissusaanut siunnersuut kinguneqassanngilaq.

**6. Innuttaasunut kingunerisinnaasai**

Siunnersuut innuttaasunut pitsaanngitsunik kinguneqassanngilaq. Siunnersuut innuttaasut qinersisussat allassimaffiannut ilanngunneqarnissamik qinnuteqarfissaat piffissalerneqarnerat sivitsorneqarpoq.

**7. Kingunerisinnaasat allat annertunerusinnaasut**

Siunnersuut annertunerusunik allanik kinguneqassanngilaq.

**8. Oqartussaasunut aamma kattuffinnut il.il tusarniaaneq**

Siunnersuut kommuninut, KANUKOKA-mut, KANUNUPE-mut, AVALAK - Danmarkimi Kalaallit Ilinniagaqartut Kattuffiat, Qinersinermut Ataatsimiititaliaq, Qinigaasinnaassuseq pillugu Ataatsimiititaliaq, Partiit tamaasa, Biskoppi, Kalaallit Nunaanni Politimestereqarfik, Pituffimmi innuttaasut isumasioqatigiiffiat, Ilinniartitaanermut Iisimatusarnermullu Naalackersuisoqarfimmut, Ilaqutariinnermut, Kultureqarnermut, Ilageeqarnermut Naligiissitaanermullu Naalackersuisoqarfik aamma Aningaasaqarnermut Naalackersuisoqarfimmut tusarniutigineqarpoq.

Tusarniaanermi piffissarititaavoq 11. juni – 13. luli 2012.

Uku tusarniaanermut akissuteqarput oqaaseqaatitaqanngitsumik:

Kanukoka, Kalaallit Nunaanni Politimesteri, Aningaasaqarnermut Naalackersuisoqarfik, Ilaqtariinnermut, Kultureqarnermut, Ilageeqarnermut Naligiissitaanermullu Naalackersuisoqarfik, Biskopeqarfik.

Uku tusarniaanermut akissuteqarput oqaaseqaatitaqartumik:

Kommune Kujalleq. Allanguineq taperserpaa.

Qeqqata Kommunian isumaqarpoq, § 20 malillugu qinersisartut tamarmik assigiimmik pineqartariaqartut. Taamaattumik allanguutissatut siunnersuut qinersisartunut tamanut atuuttariaqarpoq, § 20 imm. 5-imi taaneqartut kisiisa pinnagit.

Inatsisartut Inatsisinut Ataatsimiititaliaat peqqusinerat malillugu siunnersuut NNPAN-imit suliarineqarpoq. Tamanna tunngavigalugu allanguisoqanngilaq.

Kommuneqarfik Sermersooq nalunaarpoq tusarniaanermut piffissarititaq nutaaq pissutigalugu, tusarniaanermut akissuteqarsinnaanatik.

NNPAN tusaatissatut tiguaa.

### **Aalajangersakkanut ataasiakkaanut oqaaseqaatit**

#### *§ 1-imut*

Imm. 1.-imut

Kalaallit Nunaanni Inatsisartunut qinersisarneq pillugu Inatsisartut inatsisaanni atuuttumi § 20, imm. 5 naapertorlugu qinersisartunut Kalaallit Nunaata avataani najugaqarallartunut qinersisussat allattorsimaffiannut ilanngunneqarnissamut sap. ak. arfinillit piffissaritinneqarput. Piffissarititap sap. ak. pingasunut allangortinneqarnissaa siunnersuutigineqarpoq.

Tamanna isumaqarpoq innuttaasut pineqartut qinersisussat allattorsimaffiannut ilanngunneqarnissaminnut sap. ap. pingasunik sivisunerusumik piffissalernerqarnerat innuttaasumut iluaqutaasussamik.

#### *§ 2-mut*

Imm. 1.-imut

Inatsisissatut siunnersuutip atuutilernissaa siunnersuutaavoq 1. januar 2013 atuutilissasoq.